

REGIONAL NEWS

HEADLINES:-

1. Tripura Larsap Indra Sena Reddy Nallu-a chu Mizoram hmui turin vawiin khan rinawmna thu tiamtira lakluh a ni.
2. Mithi puala hman thin Mim Kut chu vawiin khan Aizawl Vanapa Hall ah Social Welfare, Tribal Affairs Women & Child Development buatsaiha hman a ni.
3. Filmstar hmingthang Mithun Chakraborty chu lemchan lama chawimawina sang ber Dadasaheb Phalke Award dawng tura thlan a ni.
4. Nepal tuilian leh leimin avangin mi 192 an thi tawh.

<><><>

MIZORAM GOVERNOR

Larsap Dr. Hari Babu Kambhampati-a a theih loh chungha a ai lo awl lailawk tura ruat Tripura Larsap Indra Sena Reddy Nallu-a chu vawiin khan rinawmna thu tiamtira lakluh a ni.

Pu Indra Sena Reddy Nallu-a hi Gauhati High Court Judge Justice Nelson Sailo chuan vawiin chawhma dar 10 khan Raj Bhavan Banquet Hall-ah thu tiamtirin a la lut a, he hunah hian Chief Minister Pu Lalduhoma, Assembly Speaker Pu Lalbiakzama, Minister Pu K. Sapdanga, Pu Vanlalhlana, Pu Lalsawivunga, Pu Lalthansanga, Pi Lalrinpuui, Pu Vanlalruata, Pu B. Lalchhanzova, Prof Lalnilawma, Deputy Speaker Pu Lalfamkima, Lok Sabha MP Pu Richard Vanlalhmangaiha leh sawrkar mi pawimawh dang te an tel a ni.

Larsap Dr. Hari Babu Kambhampati-a hi a khawsik a reh hleih theih loh avangin tun thla ni 7 khan Trinity Hospital-ah a lut a, a that theih mai loh avangin tun thla vek ni 9 khan Hyderabad-a Star Hospital ah dah luh a ni a. Doctor ten a hriselna dinmun an enfiah hnuah chuap lamah harsatna a nei tih hmuhchhuah a ni a, tunah hian enkawl mek a ni.

<><><>

HOME MINISTER

Home Minister Pu K. Sapdanga'n, tun thla ni 21 zana doctor kutthlak chungchang chhui chiang tur, Magisterial Enquiry din a nih tawh thu Indian Medical Association, IMA Mizoram State Branch te a hrilh.

IMA aiawhte chuan vawiin khan Home Minister Pu K Sapdanga chu a pisa ah kawmin, an doctor pui te chungha thil thleng avanga an lungawi lohna te, a case kalphung fel tawk lo nia an hriat te leh, sorkar chu Magisterial Enquiry ti ngei tura an beisei thu te an hrilh a, Home Minister chuan sorkarin he thil thleng chungchang hi an ngai thutak tih sawiin, Magisterial Enquiry nei turin thutlukna an lo siam tawh thu a hrilh a, a rang thei ang bera he enquiry hi hmalak anih tur thu a hrilh a. IMA lamin an ngaimawh hrang hrang an thlen te chu sorkarin a tul angin a lo bawhzui tur thu a sawi bawk a ni.

<><><>

MIM KUT

Mizo piputen tun hma atanga mithi puala kut an hman thin Mim Kut chu wawiin khan Vanapa Hall ah Social Welfare, Tribal Affairs Women & Child Development buatsaihin hman a ni.

He hun hi Social Welfare, Tribal Affairs, Women and Child Development Minister Minister Pi Lalrinpuii chuan a hmanpui a, Minister chuan Mizo kut pathum, Chapchar kut, Mim kut leh Pawl kut chungchang chu mipuiten ralkhat hriat tawh mahse sorkar laipui chuan hmalakna nei tharin, nikum Mim kut buatsaih kawnga nasa taka sorkarin a puih dan te a sawi lang a, kut thuken zinga tel mi harsa zawkte tana luanchhuah chu ngaihpaawimawh a tul thu a sawi a, Mizo pi leh pute lo hman thin kût te chu tunlai mil leh tih chhan tha zawk nena hman leh vawnnun bakah, chhuan thar zawkte'n an chhawmnun zel theih nana zirtir leh kaihhruai chu Mim Kût hman chhan bulpui ber zawk a ni tiin Mizo hnam zia rang te chawi nung zel a, a nihna anga ngaihlu zel turin kalkhawm te a chah bawk a ni.

Mim Kut hman na ah hian Central YMA President Pu Lalhmachhuana pawhin thu a sawi a, essay insiahsiak lawmman sem a ni bawk a, Mim Kut pual hian art exhibition neih a ni bawk.

Mim Kût hi hmanlai Mizo pipute chuan an chhungte thi tawh puala hun an hman thin a ni a. He hunah hian mitthi chhungte chuan mitthite lo ei ve tur ni a ngaiin eiturte an dahsak thin a; hei hi 'Thlaichhiah' tih a ni. Mim Kût hi Mizo thawnthu pakhat 'Tlingi leh Ngama' thawnthu behchhana lo intan nia hriat a ni.

<><><>

POSHAN MAAH CLOSING

Food, Civil Supplies & Consumer Affairs Minister Pu B. Lalchhanzovan Rastriya Poshan Maah (National Nutrition Month) 2024 kharna hun Aizawlah a hmanpui.

Supply Minister chuan Anganwadi te chu a bik taka naupang harsa zawkte tana inngahna a nih thu sawiin he scheme tihhlawhtlin kawnga hmalatu leh thawktu zawng zawngte chu theihtawpchuah a, naupangte thanlenna kawnga puitu ni zel turin a chah a ni.

Naupangte chu an tuina leh an kalna tur awma kaihruiatu ni zel tura chahin department hrang hrangte a bik takin Health, PHE, P&E leh Aayush te he scheme tihhlawhtlin zelna tur atana thawhhona tha nei turin a ngen bawk a ni.

He hunah hian Women & Child Development Director Pi Zoramthangi Chhangte chuan Mission Saksham Anganwadi & Poshan 2.0 hnuai ah Saksham AWC ni tur chuan Anganwadi-ah tui connection a awm tur a ni a. Electric Connection a awm tur a ni a. Naupangte infiamna tur classroom zau tawk tak a awm tur a ni a ti a. Hei bakah hian Chuktuah huan a awm tur a ni a. Tuizem lian hunna tur an nei tur a ni bawk a ni.

He programme-ah hian Poshan Abhiyaan hnuai ah hmalakna Saksham Anganwadi & Poshan 2.0 short Film tlangzarh a ni a, he film hi Mizo mipui zawng zawngin an thlir theih tura chhawpchuah tur a ni a.

ICDS hi Mizoram-ah Kum 1979 atanga din tan niin heng - chaw tha pek belh, hri danna pek, nute'n an fate an enkawl thiam theih nana zirtirna pek, thiam bul tanna ECCE (Early Childhood Care and Education), khawtlang mipuite nena thawhho leh mithiam zawkte hnena naupang dam lo refer te hi an hnathawh ber a ni.

<><><>

SINLUNG HILLS final ROLL

State Election Commission ruahman angin Sinlung Hills Council inthlan vawi 2-na neih tur atan Final Electoral Roll chu vawiin khan tihchhuah a ni a,

Aizawl DC, District Election Officer Pu Lalhriatpuia chuan Aizawl DC Conference Hall-ah a tlangzarh a. Aizawl District huamchin a Sinlung Hills Council Electoral Roll Final Publication a Elector awmzat chu a vaiin Voter 10,799 awmin mipa 5338 leh hmeichhia 5461 an ni a, mipa aia hmeichhia an tamna chu 123 a ni. Voter tlemna ber Polling Station chu Upper Sakawrdai Polling Station niin Voter 112 an awm a. Voter tamna ber chu Sakawrdai I Polling Station niin Voter 1219 an awm a. Sinlung Hills Council, Aizawl District huam chinah hian Constituency 6 awmin Polling Station hi 19 a awm a ni.

Vawiin roll tlangzarhna ah hian political party leh tlawmngai pawl aiawhte leh Aizawl SP, Education Department leh DIPRO atangte in an tel a ni.

Kolasib District huamchhunga Constituency pahnih -Saipum leh Saiphai Constituency bial pahnih Final Electoral Roll chu Kolasib District Election Officer, Pu Robert C. Lalhmangaiha chuan DC Conference Hall-ah a tlangzarh a.

Saipum Constituency ah Vote nei mipa 1134 leh hmeichhia 1161, an vaiin mi 2295 an awm a; Saiphai Constituency-ah mipa 1329 leh hmeichhia 1319, an vaiin mi 2648 an awm a; Saipum Constituency a hian Polling Satation pathum heng Saipum-I, Saipum-II leh Chawnpui Polling Station te an awm a. Saiphai Constituency-ah Polling Station pali : Saiphai-1, Saiphai-11, Phainuam leh Saihapui V Polling Station a awm a ni.

Vawiin vek khan Saitualah District Bawrhsap, District Election Officer ni bawk Dr. Lalingura Tlau pawh vawiin khan Final Electoral Roll hi a tlangzarh.

Saitual District chhungah Constituency 4; Khawlian, Phuaibuang, Suangluilawn leh Vanbawng chhungah a awm a, vote nei mi 8047 (mipa 4074 leh hmeichhia 3973) an awm mek a, Polling Station ah 4-NE Tlangnuam, Phuaibuang, Suangpuilawm leh Vanbawngahte Mipa voter aiin Hmeichhe voter an tam zawk a ni.

Constituency 4 zingah -Khawlian ah vote nei mi 2392 (mipa 1208 leh hmeichhia 1184) awmin an tam ber a, Vanbawngin dawtin vote nei mi 1981 (mipa 1024 leh hmeichhia 957) an awm a, Suangpuilawnin dawt

lehin voter 1930 (mipa 969 leh hmeichhia 961) awmin, 2-Phuaibuang ah voter 1744 (mipa 873 leh hmeichhia 871) awmin vote nei awm tlemna ber a ni.

Final Electoral Roll tlangzarhnaah hian election official te, BLO te NGO pawl hrang hrang aiawhte leh party aiawhte an kalkhawm a, tlangzarh a nih hnu hian Political Party aiawhte hnenah Final Electoral Roll copy hnih theuh hlan nghal a ni.

Sinlung Hills Council inthlan hun tur hi, tunkar Ningani hian State Election Commissioner Pu H. Lalthlangliana'n a pisa-ah a puang dawn a. Hetah hian member 12 awmna Sinlung Hills Council inthlan hun tur hi a puang dawn niin Akashvani Aizawl chuan thu a dawng a. Inthlan hun hi November thla bul lam a nih rin a ni. Sinlung Hills Council inthlan hi a wawi hnihna tur niin a hmasa ber chu November ni 5, 2019 khan buatsaih a ni a. Khami tum khan MNF 5, HPC 5 leh independent 2 an tling a. Tun term chung hian thuneihna chelhtu executive council wawi 3 an insiksawi a, tunah hian HPC phel leh lam leh ZPM tangrualin sorkarna an chelh mek a ni.

<><><>

HINDI PAKHWADA 2024

Indian Institute of Mass Communication (IIMC) Aizawl chuan vawiin khan Hindi Pakhwada kharna hun an hmang.

Vawiina hun hmanah hian MZU-a Hindi Department Head of Department Sanjay Kumar chuan hmanpuiin Hindi tawng pawimawhna hrang hrang a sawi a, India rama cheng Mizote tan India ram neitu an ni tih ngamna thinlung pu tur chuan Hindi thiam a ngai a ni, a ti a, kalkhawm te chu inpawh tlang leh hlim taka hun hmang turin a chah a ni.

Hindi Pakhwada hi September ni 16 atanga ni 30 thleng hman niin hemi chung hian Hindi tawng pawimawhna leh sakhuanaa a pawimawhna chungchang inzirtirna neih a ni a, vawiina hun hmanah hian Doordarshan Aizawl Director News Nampibou Marinmai pawhin Hindi pawimawhzia uar takin a sawi a. Ram chung hmun dangah hnathawk turin thalai an chhuak fova, harsatna an tawh len ber chu Hindi tawng a ni, a ti a. IIMC Aizawl Regional Director Shashwati Goswami chuan Hindi tawng thiam tan chuan khawi hmunah pawh Mizo thalaite tan hna hmuh a harsa ngailo, a ti. Tawng hi a ruka thiam chi a ni lo a, hman tama thiam chi a nih avangin an theih ang anga hmang tam turin kalkhawmte a chah a ni.

<><><>

DADASHAHEP PHALKE AWARD

Filmstar hmingthang Mithun Chakraborty chu lemchan lama chawimawina sang ber Dadasaheb Phalke Award dawng tura thlan a ni. Thlaleha Naional Film Award wawi 70-na inkhawmah he chawimawina hi hlan a ni ang. Union I&B Minister Ashwini Vaishnaw chuan social media kaltlangin he award dawng tur hi a puang a, Kolkatta kawtthler atangin Cinema lamah dinhmun sang ber luahtu Mithun-a zinkawng chu ngaihsanawm atih thu a sawi a. Indian Cinema tana a sulhnu leh hnathawh ropui tak avangin Dadasaheb Phalke Award thlangtute chuan Mithun Chakraborty hi he chawimawina ropui tak dawng tur hian an thlang ta a ni a ti.

Prime Minister Narendra Modia pawhin Mithun Chakraborty chu a lawmpui thu social media kaltlangin a sawi a. Pu Modia chuan Mithuna'n hetiang chawimawina sang tak a dawng chu a lawmawm atih htu sawiin Indian cinema tana a thawhhlawk zia chu hriatreng a ni tawh ang a ti.

<><><>

US PRESIDENT

US President chuan Taiwan hnena ralthuam tanpui nan dollar maktaduai 567 pek a remti. White House sawidanin President Biden-a hian a aiawh turin Secretary of State chu thuneihna pein dollar maktaduai 567 hi la chhuak a, Taiwan sipaite tan ralthuam leina turte, Deparnemt of Defence leh sipai inzirna leh inchherna atana hman turin phalna pe a ni. Kumin April thla khan President Biden-a hian Ukraine tanpuina turin dollar tluklehdingawn khat chuang pek alo phal tawh a, hei bakah hian Israel leh Taiwan te pawh tanpui a lo remti tawh bawk a ni.

<><><>

NEPAL FLOOD AND LANDSLIDE

Nepal tuilian leh leimin avangin mi 192 an thi tawh a. Mi 30 chuang chin hriatlohin an awm. Home Ministry thupuangtu Rishiram Tiwari sawidanin chhiatna thlengah hian mi 194 in hliam an tuar a. Mi 4500 chuang chu chhanchhuah tawh niin agency hrang hrangten chhanchhuah hna ngawrh takin an thawk mek a ti a. Chhawmdawlina bungrua hmanhmawhthlak zual chaw leh thildangte a thlawnin sem a ni a. Highway pawh te mipuite hman theih tura hawn tumin theihtawp chhuah a ni a ti bawk.

<><><>